



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 897, Datë 05. 07. 2022

“ MBI AUTORIZIMIN E PËRFTIMIT TË KONTROLLIT TË SHOQËRISË NEWCO FERRONIKELI COMPLEX L.L.C. DHE FILIALIT TË SAJ NGA SHOQËRIA YILDIRIM KOSOVO MINING INVESTMENTS L.L.C.”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar

Në mbledhjen e tij të datës 05. 07. 2022, shqyrtoi çështjen me:

Objekti: Autorizimi i përqendrimit të realizuar nëpërmjet përfutimit të kontrollit të shoqërisë Newco Ferronikeli Complex LLC dhe filialit të saj, nga shoqëria Yildirim Kosovo Mining Investments L.L.C.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfutimit të kontrollit të shoqërisë Newco Ferronikeli Complex LLC dhe filialit të saj nga shoqëria Yildirim Kosovo Mining Investments L.L.C.

VËREN SE :

I. Palët në transaksion dhe procedura

Pranë Autoritetit të Konkurrencës, është depozituar njoftimi mbi përfutimin e kontrollit të shoqërisë Newco Ferronikeli Complex LLC dhe filialit të saj, nga shoqëria Yildirim Kosovo Mining Investments L.L.C.

Referuar dokumentit “Marrëveshje për blerje aksionesh”, palët janë:

Pala blerëse: Yildirim Kosovo Mining Investment L.L.C., është një shoqëri me përgjegjësi të

kufizuar, e themeluar sipas ligjeve të Republikës së Kosovës, e krijuar me qëllim të veçantë (SPV) për realizimin e këtij transaksioni.

Yildirim Kosovo Mining Investment L.L.C. zotërohet plotësisht nga Yildirim International Mining Investments B.V., një shoqëri me përgjegjësi të kufizuar, e themeluar dhe e regjistruar sipas legjislacionit holandez, me objekt aktiviteti blerjen, mbajtjen dhe disponimin e pjesëmarrjeve në shoqëri dhe ndërmarrje të tjera etj. Yildirim International Mining Investments B.V. zotërohet 100% nga Yildirim International Investments Holding B.V. dhe është pjesë e Grupit Yildirim, i cili operon në një numër të madh industrish si: metalurgji dhe miniera, qymyre dhe coke, energji, plehra kimike etj.

Grupi Yildirim është aktualisht aktiv në Shqipëri përmes filialit të zotëruar tërësisht prej tij: Yildirim Albania Mining Investments SHPK, shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti blerjen, mbajtjen dhe transferimin e pjesëmarrjeve në shoqëri dhe ndërmarrje të tjera, financimi i këtyre shoqërive dhe ndërmarrjeve etj. Yildirim Albania Mining Investments SHPK zotëron 100% Albchrome Holding SHPK dhe Albanian Energy Supplier 2 SHPK.

Albchrome Holding SHPK është një shoqëri me përgjegjësi të kufizuar, e themeluar sipas legjislacionit shqiptar, me objekt veprimtarie: ushtrim i të drejtave të administrimit dhe shfrytëzimit, rehabilitimit, modernizimit, financimit të minierave, impianteve dhe uzinave/fabrikave etj. Albchrome Holding SHPK zotëron plotësisht: Albchrome SHPK, prodhuesi më i madh i kromit dhe ferrokromit në Shqipëri, dhe Vllahen Mining SHPK.

Albanian Energy Supplier 2 SHPK është një shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti import, eksport, tregtim dhe furnizim me shumicë dhe pakicë të energjisë elektrike, ndërtimin, zhvillimin dhe menaxhimin e impianteve, sistemeve, të prodhimit, shpërndarjes, etj.

Pala shitëse: NKL Limited është një shoqëri me përgjegjësi të kufizuar, e themeluar sipas ligjeve të Mbretërisë së Bashkuar. NKL Limited është një shoqëri holding e cila nuk kryen aktivitet tregtar, por ushtron kontrollin e vetëm dhe të drejtpërdrejtë mbi targetin Newco Ferronikeli Complex L.L.C. dhe kontrollin indirekt mbi filialin në Shqipëri, Newco Ferronikeli Complex SHPK.

NKL Limited zotërohet në pjesën më të madhe të saj nga Balfin-Balkan Finance Investment Group SHPK, shoqëri me përgjegjësi të kufizuar, e themeluar sipas legjislacionit shqiptar, me objekt të veprimtarisë: investimi në instrumente financiare; investime në pasuri të paluajtshme dhe në asete (të prekshme apo të paprekshme); ofrimi i shërbimeve të konsulencës për shoqëritë e kontrolluara prej saj dhe/ose të tretë. Pjesa tjetër e aksioneve të NKL Limited zotërohet nga aksionarë të tjerë.

Target: Newco Ferronikeli Complex L.L.C. është një shoqëri me përgjegjësi të kufizuar, e themeluar sipas ligjeve të Republikës së Kosovës, e cila kryen veprimtari në sektorin minerar, kryesisht në nxjerrjen, prodhimin dhe tregtimin e produkteve minerale jo-metalike, nxjerrjen e torfës, prodhimin e hekurit dhe çelikut bazik etj. Newco Ferronikeli Complex L.L.C. kontrollon interesin në aksionet e filialit të saj, Newco Ferronikeli Complex SHPK, në Shqipëri.

Newco Ferronikeli Complex SHPK është një shoqëri me përgjegjësi të kufizuar, e themeluar sipas legjislacionit shqiptar, e cila fokusohet në shfrytëzimin, prodhimin dhe furnizimin e ferronikelit nga territoret e licencuara. Newco Ferronikeli Complex SHPK është një shoqëri relativisht e re dhe aktiviteti i saj fokusohet vetëm tek investimi.

II. Përqendrimi

Më datë 31 maj 2022, shoqëritë Yildirim Kosovo Mining Investments L.L.C. dhe NKL Limited kanë nënshkruar “Marrëveshje për blerje aksionesh”, ku shitësi shet aksionet e shoqërisë target dhe filialit të zotëruar prej tij, dhe blerësi blen aksione me efekt që nga Data e Mbylljes së marrëveshjes.

Në përfundim të transaksionit, Yildirim International Mining Investments B.V. do të fitojë kontrollin direkt mbi shoqërinë Newco Ferronikeli Complex L.L.C. dhe kontroll indirekt mbi filialin e saj, shoqërinë Newco Ferronikeli Complex SHPK.

Transaksion plotëson kriteret e përcaktuara në nenin 10 dhe 12, të ligjit nr. 9121, datë 28.07.2003 “Për mbrojtjen e konkurrencës” dhe si i tillë kërkohet autorizimi nga Komisioni i Konkurrencës.

III. Analiza e Konkurrencës

Komisioni Evropian në praktikën e tij të vendimmarrjes i ka përcaktuar si tregje të veçanta produkti për ferronikelin dhe ferrokromin. Ferrokromi dhe ferronikeli nuk janë zëvendësues për sa i përket cilësive për konsumatorin, pasi ato janë produkte të ndryshme që u përkasin tregjeve të ndryshme të produkteve dhe të prodhuara nga lëndë të para të ndryshme.

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i prodhimit dhe furnizimi me ferronikel, por duke qenë se transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Aktivitetet tregtare të shoqërive pjesëmarrëse në këtë transaksion nuk janë të lidhura me njëra tjetrën, pasi nuk ka mbivendosje horizontale midis aktiviteteve të NewCo Ferronikeli Complex SHPK si degë e target, dhe Albchrome SHPK si filial i blerësit Yildirim Group.

Referuar të dhënave të Agjencisë Kombëtare të Burimeve Natyrore për vitin 2020, rezultoi se në tregun e prodhimit të hekur-nikelit janë pajisur me leje të shfrytëzimit të hekur-nikelit 28 subjekte nga të cilat 17 nuk janë aktive. Prodhimi nxjerrës i hekur-nikelit ka qenë 432,673 ton në total. Shoqëria NewCo Ferronikeli Complex SHPK nuk është pjese e shoqërive prodhuese, kjo shoqëri është ende në fazën e investimeve. Ndërkohë që në tregun e prodhimit të kromit, janë pajisur me leje të shfrytëzimit të kromit 261 subjekte nga të cilat 77 nuk janë aktive. Prodhimi nxjerrës i kromit ka qenë 626,627 ton në total nga të cilat shoqëria Albchrome SHPK ka realizuar një prodhim prej 100,817 ton duke mbajtur 16 % të tregut të përgjithshëm të prodhimit të tij. Në tregun e prodhimit të ferrokromit, operojnë vetëm tre shoqëri, prodhimi i përgjithshëm për vitin 2020 ka qenë 53,544 ton, nga të cilat 63.7% janë realizuar nga Albchrome SHPK.

Transaksioni i propozuar është përfitimi i kontrollit të shoqërisë NewCo Ferronikel Complex

L.L.C. dhe si rrjedhojë edhe e filialit tërësisht në zotërim të saj, shoqërisë NewCo Ferronikeli Complex SHPK nga shoqëria Yildirim Kosovo Mining Investment L.L.C..

Shoqëria Yildirim Kosovo Mining Investment L.L.C. është pjesë e Yildirim Group, e cila nëpërmjet shoqërive në zotërim të tij, operon në Shqipëri në tregun e prodhimit dhe furnizimit të ferrokromit. Shoqëria Target, NewCo Ferronikel Complex L.L.C., nuk operon në Shqipëri por ka në zotërim të saj shoqërinë NewCo Ferronikeli Complex SHPK, e cila ka si objekt aktiviteti shfrytëzimin, prodhimin dhe furnizimin me ferronikel nga territoret e licencuara. Kjo shoqëri nuk është ende operationale, pasi aktiviteti i saj fokusohet vetëm tek investimet.

Përqendrimi nuk do të krijojë mbivendosje në tregje horizontale ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,

VENDOSI:

1. Të autorizojë përqendrimin e realizuar nëpërmjet përfutimit të kontrollit të shoqërisë Newco Ferronikeli Complex LLC dhe filialit të saj nga shoqëria Yildirim Kosovo Mining Investments L.L.C.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS